

PAS S'gor yakin sokongan tak terjejas tanpa portfolio agama
MalaysiaKini.com
January 27, 2012
Abdul Rahim Sabri

Kepimpinan PAS Selangor yakin bahawa sokongan terhadap parti itu tidak terjejas sekalipun tiada wakil parti itu memegang jawatan exco hal ehwal Islam - seperti sebelum ini - di saat pilihan raya umum semakin hampir.

Malah, mereka juga menafikan rombakan exco di mana Dr Ahmad Yunus Hairi dilantik sebagai exco belia dan sukan, bukan kerana tiada calon di dalam PAS yang mampu memegang jawatan exco agama Islam.

"Itu hanya pendapat orang yang besar kepala yang menganggap hanya dirinya seorang yang mampu.

"Sebaliknya, ianya dilakukan atas sebab tekanan masa dan suasana sehingga rombakan seperti ini adalah yang paling wajar, munasabah dan diterima akal.

"Rombakan sebegini memenuhi tuntutan kawal selia dan urus tadbir kerajaan yang cekap demi menjamin perkhidmatan kerajaan terhadap rakyatnya akan berjalan lancar setiap saat," kata Ketua Pemuda PAS Selangor, Hasbullah Mohd Ridzwan dalam sidang media.

Katanya, rombakan tersebut merupakan satu perkara yang dipersetujui bersama oleh PAS negeri itu.

"Ianya dipersetujui atas sebab pilihan raya yang begitu hampir dan tugas baru, lebih-lebih lagi sebagai exco hal ehwal Islam, infrastruktur dan kemudahan awam, akan memakan masa untuk memahami dan menguasai selok beloknya," katanya lagi.

Manakala setiausaha PAS Selangor, Mohd Khairuddin Othman berkata beliau ada menerima laporan akar umbi yang menyatakan sokongan terhadap parti itu tidak terjejas susulan pemecatan Hasan Ali.

Sebaliknya, katanya, jentera di 22 kawasan terus menumpukan mengenai pilihan raya akan datang.

"Ada menyatakan PAS Selangor akan lumpuh dengan terpecatnya Hasan Ali, mereka silap," katanya.

Copyright © 1999-2012 Mkini Dotcom Sdn. Bhd
<http://www.malaysiakini.com/news/187600>